

菩薩摩訶薩應徧學諸道



「大智度論」集粹之六十

智 銘

須菩提白佛言：「世尊！菩薩摩訶薩大智慧成就，行是深法，亦不受果報！」

佛告須菩提：「如是！如是！菩薩摩訶薩大智慧成就，行是深般若波羅蜜，亦不受果報。何以故？是菩薩摩訶薩，諸法性中不動故。……菩薩於無所有性中不動；色性中不動，受、想、行、識性中不動，檀波羅蜜性中不動，尸羅波羅蜜……般若波羅蜜性中不動。四禪性中不動，四無量性中不動，四無色定性中不動，四念處性中不動，乃至八聖道分性中不動，空三昧、無相、無作三昧，乃至大慈大悲性中不動。何以故？是諸法性中即是無所有，以無所有法，不能得所有法。」

須菩提言：「所有法能得所有法不？所有法能得無所有法不？無所有法能得無所有法不？」

佛言：「不也！」

須菩提言：「若無所有不能得所有，所有不能得所有，所有不能得無所有，無所有不能得無所有，將無世尊不得道焉？」

佛言：「有得，不以此四句：非所有，非無所有，無諸戲論，是名得道。」

須菩提言：「何等是菩薩摩訶薩戲論？」

佛告須菩提：「菩薩摩訶薩觀色，若常若無常，是為戲論。觀受、想、行、識，若常若無常，是為戲論，觀色若苦若樂，受、想、行、識若苦若樂，是為戲論。觀色若我若非我，受、想、行、識若我若非我，色若寂滅若不寂滅，受、想、行、識若寂滅若不寂滅，是為戲論。若聖諦應見，集聖諦應斷，滅聖諦應證，道聖諦應修，是為戲論。應修四禪、四無量心、四無色定，是為戲論。應修四念處、四勤正、四如意足、五根、五力、七覺分、八聖道分、是為戲論。應修空解脫門、無相解脫門、無作解脫門，是為戲論。應修八背捨、九次第定，是為戲論。我當過須陀洹

果、斯陀含果、阿那含果、阿羅漢果、辟支佛道，是爲戲論。我當具足菩薩十地，是爲戲論。我當入菩薩位，是爲戲論。我當淨佛國土，是爲戲論。我當成就衆生，是爲戲論。我當生佛十力、四無所畏、四無礙智、十八不共法，是爲戲論。我當得一切種智，是爲戲論。我當斷一切煩惱習，是爲戲論。是菩薩摩訶薩行般若波羅蜜時，色若常若無常，不可戲論故，不應戲論，受、想、行、識若常若無常不可戲論故，不應戲論。乃至一切種智不可戲論故，不應戲論。何以故？性不戲論性，無性不戲論無性、離性、無性，更無法可得。所謂戲論者，戲論法，戲論處。以是故，色無戲論，受、想、行、識乃至一切種智無戲論。如是，菩薩摩訶薩，應行無戲論般若波羅蜜。」

佛又言：「色性無，乃至一切種智性無。若法性無，即是無戲論。以是故，色不可戲論，乃至一切種智不可戲論。若菩薩摩訶薩能如是行無戲論般若波羅蜜，是時得入菩薩位。」

須菩提白佛言：「若諸法無有性，菩薩行何等道入菩薩位？爲用聲聞道？爲用辟支佛道？爲用佛道？」

佛告須菩提：「不以聲聞道，不以辟支佛道，不以佛道，得入菩薩位。菩薩摩訶薩徧學諸道，得入菩薩位。譬如八人先學諸道，然後入正位，未得果而先生果道。菩薩亦如是，先徧學諸道，然後入菩薩位；亦未得一切種智，而先生金剛三昧，爾時，以一念相應慧得一切種智。」

須菩提問：「云何當知菩薩摩訶薩徧學諸道，得入菩薩位？」

佛告須菩提：「若菩薩摩訶薩作八人得須陀洹果，乃至得阿羅漢果、得辟支佛道，然後入菩薩位，無有是處。不入菩薩位，當得一切種智，無有是處，若菩薩摩訶薩，從初發意行六波羅蜜時，以智觀過八地，何等八地？乾慧地、性地、八人地、見地、薄地、離欲地、已辦地、辟支佛地，以道種智入菩薩位，入菩薩

位已，以一切種智斷一切煩惱習。八人若智若斷，是菩薩無生法忍；須陀洹若智若斷，斯陀含若智若斷，阿那含若智若斷，阿羅漢若智若斷，辟支佛若智若斷，皆是菩薩忍。菩薩學如是聲聞、辟支佛道，以道種智入菩薩位，入菩薩位已，以一切種智斷一切煩惱習，得佛道。如是，菩薩摩訶薩徧學諸道具足，應得阿耨多羅三藐三菩提，得阿耨多羅三藐三菩提已，以是饒益衆生。」

須菩提白佛：「何等是菩薩道種智？」

佛告須菩提：「菩薩摩訶薩應生一切道種淨智，何等是道種淨智？若諸法相貌所可顯示法，菩薩應正知。正知已，爲他演說、開示，令諸衆生得解。是菩薩摩訶薩，應解一切音聲語言，以是音聲說法，徧滿三千大千世界，如響相。以是故，菩薩摩訶薩，應先具足學一切道。道智具足已，應分別知衆生深心：所謂地獄衆生，地獄道，地獄因，地獄果。應知、應障，畜生、餓鬼道，畜生、餓鬼因，畜生餓鬼果，應知、應障；……無邊虛空處、無邊識處、無所有處、非有想非無想處道，因果應知。四念處、四勤正、四如意足、五根、五力、七覺分、八聖道分，因果應知。空解脫門、無相解脫門、無作解脫門、佛十力、四無所畏、四無礙智、十八不共法、大慈大悲，因果應知。菩薩以是道，令衆生入須陀洹道，乃至阿羅漢、辟支佛道，乃至阿耨多羅三藐三菩提道，是名菩薩摩訶薩淨道種智。菩薩學是道種智已，入衆生深心相。入已，隨衆生心如應說法，所言不虛。何以故；是菩薩摩訶薩，善知衆生根相，知一切衆生，心、心相法所趣。菩薩摩訶薩如是應行道般若波羅蜜，何以故？一切諸善助道法，皆入般若波羅蜜中，諸菩薩摩訶薩、聲聞、辟支佛所應行。」

須菩提白佛言：「若四念處乃至阿耨多羅三藐三菩提，是一切法，皆不合不散，無色、無形、無對，一相所謂無相。世尊！云何是助道法，能取阿耨多羅三藐三菩提？是不合不散，無色、

無形、無對，一相所謂無相，無所取，無所捨，譬如虛空無所取捨。」

佛言：「如是！如是！諸法自相空，無所取，無所捨。有象生不知諸法自相空，如是象生故，顯示助道法，能至阿耨多羅三藐三菩提。復次，所有色、受、想、行、識，所有檀波羅蜜。：般若波羅蜜，所有內空、外空，乃至無法有法空，初禪乃至非有想非無想處，四念處乃至八聖道分，三解脱門、八背捨、九次第定，佛十力、四無所畏、四無礙智、十八不共法、大慈大悲、一切種智等諸法，於是聖法中，皆不合不散，無色、無形、無對，一相所謂無相。以世俗法故，為象生說令解，非以第一義。於是一切法中，菩薩摩訶薩以智見如法應學。學已，分別諸法，應用、不應用。：：：如聲聞法、辟支佛法，分別知不應用，一切種智，分別知應用。」

須菩提白佛言：「若菩薩摩訶薩不學諸法相，云何學諸法相？若有為、若無為，學已過聲聞、辟支佛地？若不過聲聞、辟支佛地，云何入菩薩位？若不入菩薩位，云何當得一切種智？若不得一切種智，云何當轉法輪？若不轉法輪，云何以三乘度象生生死？」

佛告須菩提：「若諸法實有相，菩薩應學是相。以一切法實無相，無形、無色、無對，一相所謂無相。以是故，菩薩摩訶薩不學相，不學無相。何以故？有佛無佛，諸法一相，性常住。：：：諸法無相，非一相，非異相，若修無相，是修般若波羅蜜。」

須菩提言：「云何修無相是修般若波羅蜜？」

佛言：「修諸法壞，是修般若波羅蜜。修色壞；修受、想、行、識壞；修眼、耳、鼻、舌、身、意壞；修色、聲、香、味、觸壞；是修般若波羅蜜。修不淨觀壞，修初禪、第一、第二、第三、第四禪壞，是修般若波羅蜜。修慈、悲、喜、捨壞；修無邊

空處、無邊識處、無所有處、非有想非無想處壞，是修般若波羅蜜。修念佛、念法、念僧、念戒、念捨、念天、念滅、念安般壞，是修般若波羅蜜。修無常相、苦相、無我相、空相、集相、因相、生相、緣相、閉相、滅相、妙相、出相、道相、正相、跡相、離相壞，是修般若波羅蜜。修十二因緣壞；我相、象生、壽命相，乃至知者、見者相壞，是修般若波羅蜜。修常相、樂相、淨相、我相壞，是修般若波羅蜜。修四念處，乃至八聖道分壞；修空三昧、無相三昧、無作三昧壞；修八背捨、九次第定壞；修有覺有觀三昧、無覺有觀三昧、無覺無觀三昧壞，是修般若波羅蜜。修苦聖諦、集聖諦、滅聖諦、道聖諦壞，是修般若波羅蜜。修苦智、集智、滅智、道智壞，是修般若波羅蜜。修盡智、無生智壞；修法智、比智、世智、他心智壞；是修般若波羅蜜。修檀波羅蜜，乃至般若波羅蜜壞，是修般若波羅蜜。修內空、外空乃至無法有法空壞，是修般若波羅蜜。修佛十力、四無所畏、四無量智、十八不共法壞，是修般若波羅蜜，修須陀洹果、斯陀含果、阿那含果、阿羅漢果、辟支佛道壞，是修般若波羅蜜。修一切智壞、修斷一切煩惱習壞，是修般若波羅蜜。」

須菩提白佛言：「云何名修色壞，乃至修斷一切煩惱習壞，是修般若波羅蜜？」

佛告須菩提：「菩薩摩訶薩行般若波羅蜜時，不念有色法；不念有受、想、行、識；乃至不念有斷一切煩惱習法，是為修般若波羅蜜。何以故？有法念者，不修般若波羅蜜。有法念者，不修檀波羅蜜乃至般若波羅蜜。何以故？是人着法，不行檀波羅蜜乃至般若波羅蜜。如是著者，無有解脫、無有道、無有涅槃。有法念者，不修四念處、四正勤、四如意足、五根、五力、七覺分、八聖道分，不修空三昧，乃至不修一切種智。何以故？是人著法故。」

須菩提白佛言：「何等是有法？何等是無法？」

佛告須菩提：「二者是有法，不二者是無法。……色相是二，受、想、行、識相是二，眼相乃至意相是二，色相乃至法相是二，檀波羅蜜乃至佛相，阿耨多羅三藐三菩提相，有爲、無爲性相是二。一切相皆是二，一切二皆是有法，若有法便有生死，若有生死不得離生、老、病、死，憂悲苦惱。以是因緣故，當知二相者，無有檀波羅蜜乃至般若波羅蜜，無有道，無有果，乃至無有順忍；何況見色相，乃至見一切種智相！若無修道，云何得須陀洹果，乃至阿羅漢果、辟支佛道，阿耨多羅三藐三菩提，及斷一切煩惱習。」

佛說菩薩行六波羅蜜，不受世間果報，須菩提歎未曾有，認是菩薩爲大利故，不受小報，佛可其意，更自說因緣：所謂菩薩於諸法性中不動。諸法性者，無所有畢竟空，如、法、性、實際，菩薩定心安住是性中不動；色性中不動，乃至大慈大悲等性中不動。何以故？是諸法性，象因緣生，故不自在、無定相，無定相故無所有。諸法者、所謂色等法，因是色法故說無爲，是故無爲法亦無所有。何以故？不可以無所有法得所有法。

無所有法，得一切聖人所稱讚，所住處，不能有所得，所有法當亦不得所有法。所有、無所有，二俱有過。無所有法亦不可得無所有，何以故？所有法有生相、住相，以虛誑故，當無所得，何況無所有！從本以來畢竟空而有所得！

佛云：「非所有，非無所有，無諸戲論，是名得道。」四句皆不得，但實有道法，何以故？四句有如上失故，若離是四句戲論，即是道。

所謂「戲論」，是色等若常、若無常，是爲菩薩戲論。何以故？若常則不生不滅，無罪福好醜；無常亦不然，何以故？因常說無常，常既不可得，何況無常。復次，若無常是色等實相，亦不應有業因緣果報，何以故？色等諸法念念滅失故。若業因緣果報滅，則不名無常相。如是等種種因緣故，無常非是色等實相，

如先破無常中說，乃至作是念：「我當斷一切煩惱習。」是爲戲論。色等諸法不可戲論，而凡夫人戲論諸法，菩薩於不可戲論，隨法不戲論。何以故？自性不能戲論自性，所以者何？性從因緣生故，但有假名，云何能戲論？若性不能戲論，何況無性！無性、離性，更無第三法可戲論。所謂戲論者：戲論法、戲論處，是法皆不可得。色等法不可戲論相，如是，菩薩應行無戲論般若波羅蜜，若菩薩能行是不可戲論般若，便得入菩薩位。

菩薩乃大乘人故，不應用二乘道入無戲論菩薩位，又六波羅蜜未具足故，亦不能用佛道，菩薩應偏學諸道，入菩薩位，先備學諸道，住金剛三昧，以一念相應慧，得一切種智果。

菩薩初發意，行六波羅蜜時，以智慧觀入八地直過，入菩薩位，得一切種智，斷煩惱習。二乘人於諸佛菩薩智慧得少氣份，是故八人若智若斷，乃至辟支佛若智若斷，皆是菩薩無生法忍。智，名學人八智，無學或九或十。斷，名斷十種結使，所謂上、下分十結。須陀洹、斯陀含畧說斷三結，廣說斷八十八結。阿那含畧說斷五下分結，廣說斷九十二。阿羅漢畧說三漏盡，廣說斷一切煩惱。是名智斷。智斷皆是菩薩忍。聲聞人以四諦得道，菩薩以一諦入道。佛說是四諦皆是一諦，分別故有四。是四諦二乘智斷，皆在一諦中，菩薩住柔順忍中，學無生、無滅，亦非無生非無滅；離有見、無見，有無見，非有非無見等。滅諸戲論，得無生忍。無生忍者，常不生惡心，是故名無生忍。

得是忍，觀一切法畢竟空。斷緣，心、心數法不生，是名無生忍，或能過聲聞、辟支佛智慧，名無生忍。聲聞、辟支佛智慧，觀色等五象生滅，心厭、離欲解脫。菩薩以大智慧觀生滅時，心不怖畏如小乘人。菩薩以慧眼求生滅實定相不可得。但以肉眼粗心，見有無常生滅。凡夫人於諸法中著常見，是所著法還歸無常，象生得憂悲苦惱。是故，佛說欲離憂苦，莫觀常相，是無常破常顛倒故，不爲著無常故說，是故菩薩捨生滅觀，入不生不滅

中。

無常有二種：一者、破常顛倒，不着無常。二者、著無常生戲論。無生忍亦如是；一者、破生滅，不著無生無滅故，不墮常顛倒，二者、著不生滅故，墮常顛倒，真無常者，滅諸觀，語言道斷，觀一切法如涅槃相。從本以來常自無生，非以智慧觀故令無生。得是無生無滅畢竟清淨，無常觀尚不取，何況生滅。如是等相，名無生法忍。得是無生法忍故，入菩薩位。入已，以一切種智斷煩惱及習，種種因緣度一切眾生，多所饒益。

菩薩住無生忍法，得諸法實相，從實相起，取諸法名相語言，既自善解，為眾生說，得令開悟。菩薩福德因緣故，解一切眾生音聲語言，以是音聲徧三千大千世界，亦不著是聲。以是故，菩薩應知一切道，徧觀衆生心，知其本末，以善法利益，遮不善法——惡道。訶惡道，讚善道。菩薩知衆生應以小乘法度者，以小乘法而度之。應以大乘法度者，以大乘法而度之。如是道種慧及諸助道法，皆攝在般若中，是故菩薩當行道慧般若。

助道法皆空，有衆生不知如是諸法自相空，故為分別是助道法，能得阿耨多羅三藐三菩提，非但三十七品空不合不散；所有色等乃至一切種智，於聖法中亦自相空不合不散。不合不散者，是畢竟空義，一相所謂無相。是法雖空，以世諦故為衆生說，欲令得入聖法，非第一義。是中；菩薩皆應以知、見學是法。初知名知，後深入名見；知名未了，見名已了。

聖法是般若異名字，聖法中諸聖賢，若佛、若辟支佛、聲聞等，以欲等諸法不合不散。不合者，一切煩惱名顛倒，顛倒即無所有，若無所有，云何可合？若不合，云何有散？不合故不輕凡人，不散故不自高。於一切衆生不憎不愛。是法皆無色、無形、無對，一相所謂無相，無色與無色法不合不散，乃至無相法與無相法不合不散。何以故？是法皆一性故。自性不與自性合，是名一相無相般若波羅蜜，菩薩應學。學已，無法可得相，一切法無

實相，是故菩薩不應學相，無相亦不應學，以取相故。有佛無佛，諸法常住，一相所謂無相。

菩薩不學有相無相，但修諸法壞，是修般若。以諸法壞故，無相亦壞。修色法壞，即是修般若波羅蜜。乃至修斷一切煩惱習壞，即是修般若波羅蜜。菩薩一心念薩婆若，憐愍衆生，欲得正行般若波羅蜜，不念色是有法，如是修，是修般若。以色是定實，有相過故。所以者何？有相者不修般若，般若中無法尚無，何況有法。是人修般若波羅蜜，亦不修五波羅蜜，是人著有法戲論，不修布施等。如是著者，無有解脫，無道、無涅槃、無三解脫門故，言無解脫；無聖人空法故言無道，無道故無涅槃。

無道者，是人戲論諸法，不厭老、病、死，著法故生邪見。邪見故，不能如實觀身不淨等，不能觀身故，不修身念處，不修身念處故，不能修受、心、法、念處。不修四念處故，不能修乃至一切種智。何以故？著有法故。

所謂有法、無法者，二相是有，不二相是無。取色相是二，離色無眼，離眼無色，乃至有為、無為性。何以故？離有為不得說無為，離無為不得說有為實相。是故，二法不得相離，凡夫謂此為二，是故顛倒。一切法中，取相皆是二，一切二皆是有，有便有生死。何以故？有中生著心，著心因緣生諸煩惱，煩惱因緣往來生死，生死因緣而憂悲苦惱。是故說適有法便有生死，有生死不得免老、病、憂苦。以是，當知二相人無有檀波羅蜜，乃至無有順忍，何況見色實相。乃至見一切種智相，是人若不見色等諸法實相，則無修道，云何有須陀洹果，乃至斷一切煩惱習？

六波羅蜜有二種：世間，出世間，此人無有出世間六波羅蜜故，是故說是有相人無有六波羅蜜。若有者，但有世間波羅蜜，是人聲聞道種尚無，何況有佛道？故佛云：「若無修道，云何得阿耨多羅三藐三菩提，及斷一切煩惱習。」是故，菩薩摩訶薩應徧學諸道，成就佛道，以是饒益衆生。